

"Шет мемлекеттердің дипломатиялық почтасын және дипломатиялық курьерлердің жеке заттарын Қазақстан Республикасының шекарасы арқылы өткізудің уақытша ережелері" туралы

Күшін жойған

Қазақстан Республикасы Министрлер Кабинетінің қаулысы 13 шілде 1993 ж. N 599. Қаулының күші жойылды - ҚР Үкіметінің 2005 жылғы 27 шілдедегі N 781 қаулысымен

Шет мемлекеттердің дипломатиялық почтасын Қазақстан Республикасының мемлекеттік шекарасы арқылы өткізуге бақылау жасауды қамтамасыз ету, бұл жұмысты халықаралық нормаларға сәйкес келтіру мақсатында Қазақстан Республикасының Министрлер Кабинеті қаулы етеді:

1. Шет мемлекеттердің дипломатиялық почтасын және дипломатиялық курьерлердің жеке заттарын Қазақстан Республикасының шекарасы арқылы өткізудің уақытша ережелері бекітілсін (қоса беріліп отыр).

2. Қазақстан Республикасының Сыртқы істер министрлігі, Ұлттық қауіпсіздік комитеті, Ішкі істер министрлігі, Қаржы министрлігінің Бас кеден басқармасы және Қазақ азаматтық авиация басқармасы Шет мемлекеттердің дипломатиялық почтасын және дипломатиялық курьерлердің жеке заттарын Қазақстан Республикасының шекарасы арқылы өткізудің уақытша ережелерінде көзделген қағидалардың мүлтіксіз орындалуын қамтамасыз етсін.

3. Қазақстан Республикасының Сыртқы істер министрлігі Алматы қаласында тіркелген шет мемлекеттердің дипломатиялық өкілдіктерін Қазақстан Республикасының мемлекеттік шекарасы арқылы дипломатиялық почтаны және дипломатиялық курьерлердің жеке заттарын өткізу ережелері туралы хабардар е т с і н .

4. Осы Қаулының орындалуын бақылау Қазақстан Республикасының Сыртқы істер министрлігіне жүктелсін.

*Қазақстан Республикасының
Премьер-министрі*

Қазақстан Республикасы
Министрлер Кабинетінің
1993 жылғы 13 шілдедегі
N 599 қаулысымен

Бекітілген

Шет мемлекеттердің дипломатиялық почтасын және дипломатиялық курьерлердің жеке заттарын Қазақстан Республикасының мемлекеттік шекарасы арқылы өткізудің Уақытша ережесі

1. Дипломатиялық почта арқылы кедергісіз қарым-қатынас жасау құқығын мына төмендегілер пайдаланады: Қазақстан Республикасы дипломатиялық немесе консулдық қатынастар жасайтын мемлекеттердің сыртқы істер министрліктері (ведомстволары); осы мемлекеттердің Қазақстан Республикасының аумағындағы және үшінші елдердегі дипломатиялық және консулдық өкілдіктері; сондай-ақ Қазақстан Республикасының аумағындағы халықаралық ұйымдар және шет мемлекеттердің осы ұйымдардағы өкілдіктері, егер бұл Қазақстан Республикасы бір жақ болып табылатын тиісті халықаралық келісімдерде көзделген болса, бұл орайда "дипломатиялық почта" деген термин арқылы мұндай мекемелер мен ұйымдардың ресми корреспонденциясын, яғни оларға және олардың міндеттеріне қатысы бар бүкіл корреспонденцияны түсіну керек.

Бұл құқық Қазақстан Республикасының дипломатиялық немесе консулдық қатынастары болмай отырған шет мемлекеттердің дипломатиялық почтасының, егер бұл мемлекеттер Қазақстан Республикасының дипломатиялық почтасының транзитіне кедергі келтірмейтін болса, Қазақстан Республикасының аумағы арқылы жүзеге асырылатын транзитіне қолданылады.

2. Қазақстан Республикасының мемлекеттік шекарасы арқылы өтетін дипломатиялық почтаны ашуға да, бөгеуге де болмайды.

Дипломатиялық почтаны құрайтын барлық орындарда олардың сипатын білдіретін сыртқы таңбалары болуға тиіс және бұл орындарда тек ресми корреспонденция мен құжаттар немесе ресми пайдалануға арналған заттар ғана болады.

Дипломатиялық почтаның әрбір орнына сүргіштелген мөр басылуға немесе жолдаушының қорғасын мөрімен пломбалануға тиіс және "Expedition officielle" деген жазуы бар жапсырма қағазы болуға тиіс. Дипломатиялық почтаның салмағы 70 килограмнан аспауы керек. Транзиттік дипломатиялық почтаның салмағы шектелмейді.

3. Дипломатиялық курьер ресми құжатпен (курьерлік парақпен) жабдықталып, бұл құжатта оның статусы және дипломатиялық почтаны құрайтын орындардың саны көрсетіледі. Уәкілдігі бар қызметкер қол қойған бұл құжат дипломатиялық почтаны жолдаушы мекеменің мөрімен расталады.

Өз міндеттерін атқару кезінде дипломатиялық курьердің жеке басына тиісушілікке жол берілмейді және оны қандай да бір формада қамауға немесе ұстауға болмайды. Дипломатиялық курьерлердің жеке заттары жеке қажеттілік

шеңберінде кедендік тексерусіз өткізіледі.

4. Дипломатиялық почтаны азаматтық ұшақтың әуежайға бара жатқан экипажының командиріне сеніп тапсыруға да болады. Бұл жағдайда командир дипломатиялық почтаны құрайтын орындардың саны көрсетілген ресми құжатпен (куррьерлік парақпен) жабдықталады, бірақ дипломатиялық куррьер болып есептелмейді. Өкілдік дипломатиялық почтаны ұшақ командирінен тікелей және кедергісіз қабылдап алуға өз қызметкерлерінің бірін жібере алады.

5. Дипломатиялық почта сондай-ақ ресми құжатпен жабдықталған (куррьерлік парақпен) уақытша дипломатиялық куррьерге - ad hoc сеніп тапсырылуы мүмкін. Мұндай жағдайда осы Ережелердің, дипломатиялық куррьерлердің өздерінің міндеттерін орындау кезінде пайдаланатын артықшылықтары мен иммунитеттерінің оған сеніп тапсырған дипломатиялық почтаны белгіленген жеріне жеткізген уақытта тоқтатылатынын қоспағанда, қағидалары қолданылады.

6. Қазақстан Республикасының мемлекеттік шекарасынан дипломатиялық почтаны өтетін дипломатиялық куррьер немесе ұшақтың командирі кедендік мекемеге осы почтаға жазылған ресми құжатты (куррьерлік парақты) көрсетеді.

Шетелдік дипломатиялық почтаға жазылған куррьерлік парақта Қазақстан Республикасынан дипломатиялық почтаны алып шығу кезінде Қазақстан Республикасы Сыртқы істер министрлігінің және Қазақстан Республикасына дипломатиялық почтаны алып кірерде Қазақстан Республикасының дипломатиялық (консулдық) өкілдігінің визасы болуға тиіс.

Өзаралық негізде куррьерлік парақтарға виза қою талап етілмейді. Куррьерлік параққа виза қоймайтын елдердің тізімін Қазақстан Республикасы Қаржы министрлігінің Бас кедендік басқармасы кедендік мекемелерге хабарлайды.

7. Дипломатиялық (консулдық) өкілдіктің дипломатиялық почтаны қарсы алушы немесе шығарып салушы қызметкерлерінің бір күнтізбелік жыл бойында, көрсетушіге берілген, қолданыстағы тұрақты рұқсат қағазымен әуежайдың ұшу алаңына кіру хұқығы бар. Осы рұқсат қағазы әуежайдың бақылау-жіберу пунктінде өкілдік қызметкерінің дипломатиялық немесе қызмет карточкасымен бірге көрсеткенде жарамды болып табылады.

Алып жүрген дипломатиялық почтаны алу немесе жіберу үшін тиісті ұшақ тұратын жеріне келген соң өкілдіктің дипломатиялық нөмірі бар машинасымен әуежайдың ұшу алаңына кіруге рұқсат беріледі.

Дипломатиялық (консулдық) өкілділіктерге белгіленген үлгідегі тұрақты рұқсаттамаларды ресімдеуді және беруді Қазақстан Республикасы Сыртқы істер министрлігінің ресми жазбаша өтініміне орай шекара және кеден органдарымен келісім бойынша әуежайдың әкімшілігі жүргізеді.<*>

ЕСКЕРТУ. 7-тармақ өзгерді - ҚР Үкіметінің 2000.07.27. N 1132 қаулысымен

8. Кедендік мекемелер дипломатиялық почтаны тек сыртынан тексереді, сол процесс барысында оның дайындалуының осы Ережелерге сәйкестігі анықталады. Осы Ережелерді бұза отырып дайындалған жерлер дипломатиялық почта деп саналмайды.

9. Дипломатиялық курьерлер алып жүрмейтін дипломатиялық почта вализ-қапшықтарға немесе берік былғары немесе тоқыма материалдан жасалған сөмкелерге салынып, жіберушінің сүргіштік мөрі немесе пломба соғылған және "Expedition officielle" жазбасы және жіберуші мен алушының дәл мекен-жайы болуы тиіс. Вализа ілініп тұратын немесе ішкі құлыппен жабдықталуы мүмкін және әрбір вализаның салмағы 10 кг-нан аспауға тиіс.

Салмағы 10 кг-нан асатын дипломатиялық почтаны жіберу үшін жіберуші әуежайдың Халықаралық секторына күні бұрын өтініш жасайды.

Шетелге жіберілуге тиіс, курьерлер алып жүрмейтін, осы Ережелерге сәйкес дайындалған дипломатиялық почтаны жіберуші әуежайға 3 сағаттан кешіктірмей және дипломатиялық почта кететін ұшақтың ұшуына дейін бір тәуліктен ерте емес уақытта жеткізеді.

Дипломатиялық өкілдіктің мекен-жайына түскен, курьерлер алып жүрген дипломатиялық почта алушыға қажетті кедендік формалдылықтарды орындаған соң әуежайдың халықаралық қоймасы арқылы беріледі. -----
- - -

Е с к е р т у .

Осы Ережелер Дипломатиялық қарым-қатынастар туралы 1961 жылғы 18 сәуірдегі Вена конвенциясының негізінде жасалған.